

七十二家集

劉戶曹集小引

從古兩書淫一皇甫玄晏
一劉玄靖玄晏高尚其事
超然冥鴻非若玄靖文禽
顧影翻鏹彩于太液池邊
也玄靖身際右文之朝並

世儔流盡被隆遇而峻獨
坎輶以終申公明之指歸
托敬通之同異至今掩卷
有餘恫焉如謂率性而動
不共浮沈則爾時之負遺
俗者豈直一峻哉何加膝

墮淵之異効也。下士蒨有
言擲五木子輒韃。豈復是
擲子之拙。此足破遇合之
界耳。昭明文選。梁人自任
沈外見收者寥々。而玄靖
採取者三。然則聲價故重。

于華林二三子正不得以
遍畧高之矣

甲子暮春望日紹和張燮
書于覓蠡軒

劉戶曹集目錄

卷之一

詩

登郁洲山望海

自江州還入石頭詩

始營山居

出塞

啓

送橘啓

書

與宋玉川元思書

與舉法師書

答劉之遴借類苑書

劉之遴與劉孝標書附

追答劉沼書

答郭峙書

稱族子訐歆書

序

相經序

自序

志

東陽金華山栖志

卷之二

論

辯命論

有序

廣絕交論

附錄

劉峻傳

陳姚察

劉峻傳

唐李延壽

讀史考誤

明張燮

紫巖

明杜栢

劉參軍孝標

明胡應麟

遺事

集評

梁平野集卷之一

梁平原劉峻孝標著

明閩漳張燮紹和纂

詩

登郁洲山望海

滄溟聯霄岫層嶺鬱嶙峋下盤鹽海底上轉靈
鳥翼溟渤非可辨鴻溶信難測輕塵久弭飛驚
浪終不息雲錦曜石嶼羅綾文水色

自江州還入石頭詩

藝文作劉峻英華次
元帝後而逸其名或

以爲元帝詩非也

鼓枻浮大川延盼洛城觀洛城何鬱鬱杳與雲
霄半前望蒼龍門斜瞻白鶴館魏垂御溝道柳
綴金堤岸迅馬晨風趨輕輿流水散高歌一作唱
梁塵下絙瑟荆禽亂我思江海遊曾無朝市玩
忽寄靈臺宿空軫及關歎仲子入南楚伯鸞出
東漢何能栖樹枝取斃王孫彈

始營山居

自昔厭諠囂執志好栖息嘯歌棄城市歸來事

畊織鑿戶闕嵯峨閒軒望
漸澗激水簷前溜修竹堂
陰植香風鳴紫鸞高梧巢
綠翼泉脈洞杳杳一作沉
涼下不極髣髴玉山隈想
像瑤池側夜誦神仙記旦
吸雲霞色將馭六龍輿行
從三鳥食誰與金門士撫
心論胸臆

出塞

薊門秋氣清飛將出長城
絕漠衝風急交河夜月明
陷敵撻金鼓摧鋒揚旆旌
去去無終極日暮動邊聲

啓

送橘啓

南中橙甘青島所食始霜之旦採之風味照座
勝之香霧噴人皮薄而味珍脈不粘膚食不留
滓其踰萍實冷亞冰壺可以熏神可以茗鮮可
以漬蜜瓊鄉之果寧有此耶

書

與宋玉山元思書

驅馬金張之館飛蓋許史之廬習匡鼎之說詩
騁谷雲之雕篆賓徒波湧輿輪靡息當是時也
樂可言哉然靜思夫君愀焉軫歎何則方鑿圓
轉銀錯難從翔鳥游魚蹉跎不狎是以賈生懷
琬琰而挫翮馮子握璵璠而鍛羽天誕英逸獨
擅民秀心貞筠箭德潤珪璋信人之水鏡一性
之鎔範而荆南雄曲高音鮮和河西名驥滅淝

誰貴故若先生者進有三難退有三樂竊觀先生未能鴻翔鸞起騰霞躋漢將由囿空桑麻田無負郭俛眉翕肩以斯故耳今賢弟賓從抗鱗奮翼或衣繡江塘或鳴騶洛渚連騎方驅擊鐘乃食萼耐若是吾子復何憂哉惟當纂兩仲之微迹襲二疎之風流生與漁父同嬉死葬要離墓側金石可碎聲華無寂斯道坦坦先生幸甚

勗真

與舉法師書

關諸行李高談微德逖聽風聲心飛魂竦無異
躡仙之望石髓太陰之思龍燭蒼星昏昊涼雲
送秋道勝則肥固應願攝衣裳虹蜺帷幕霄露
餌黃菊之落藥酌清澗之苾流旦候歸鴈晨鳧
暮聽羈雌獨鶴神影影霽蓋象蕭史之騎鳴鳳
列子之御長風雖荆卿有若無人孝然堅卧冰
雪沈沈隱隱何以尚之哉至於馳騫經囿翔翔
書圖極龍宮之妙典彈石室之鴻記道生伏其

天真曼倩謝其辭物若乃習是童子措志雕蟲
思內流英華外發葳蕤秋竹照曜春松爵頌
惠明珠之譽長門濫黃金之賞盛矣美矣煥其
麗乎昔旅浙河嘗觀組纈不覺紙蕪筆焚魂魄
斯盡自茲厥後兩絕珪璧意睖睖於菁華腸迴
迴於九逝夫日御停照不踰隙穴海若瀆湧莫
限隈隅以玉抵鵲昔傳餘寶冀閱清徽用瘳眩
疾然越民非鬻冠之所齊國豈奏韶之地望與
其進無貽責焉

答劉之遴借類苑書

九冬有隙三餘暇時多游書圃代樹萱蘇若夫
采蠶蠶於細紈閱微言於殘竹嗚飫膏液咀嚼
英華不知地之爲興天之爲蓋靡測廻塘莫辨
輿馬烏是以言乎是用周流墳素詳觀圖諜搦
管聯冊纂茲英竒蛩蛩之謀止於善草周周之
計利在銜翼故鳩集斯文益自綴其漏耳豈冀
藏山之名播於士大夫哉

劉之遴與劉孝標書附

間聞足下作類苑括綜百家馳騁千載彌綸
天地纏絡萬品撮道略之英華搜群言之隱
賸鈇摘旣畢殺青已就義以類聚事以群分
述征之妙揚班儔也擅此博物何快如之雖
後子野調聲竒知音於後世文信構覽懸百
金於當時居然無以相尚自非沈鬱澹雅之
思安能閑志經年勤成若此吾嘗聞爲之者
勞觀之者逸足下已勞於精力宜令吾見異

書

追答劉沼書

劉侯旣重有斯難值予有天倫之感竟未之致也尋而此君長逝化爲異物緒言餘論蘊而莫傳或有自其家得而示余者余悲其音微未沫而其人已亡青簡尚新而宿草將列泫然不知涕之無從也雖隙駟不留尺波電謝而秋菊春蘭英華靡絕故存其梗槩更酬其旨若使墨翟之言無爽宣室之談有徵冀東平之樹望咸陽而西靡蓋山之泉聞弦歌而赴節但懸劒空櫓

劉子曹集

卷一

七

有恨如何

答郭峙書

聞君子舊矣但人非豕鹿轉加遲滯波駁雨滯
動間出川故無由交羽觴薦雜佩睨浮雲以搔
首臨清風而浩歌變燧迴星亦云勞止

稱族子訐歆書

劉訐字彥度兄歆字士光並履高操共
上策鍾山宋熙寺東澗有終焉之志族
祖孝標與
書稱之

訐超越俗如半天朱霞歆矯矯出塵如雲巾
白鶴皆儉歲之梁稷寒年之織纈

序

相經序

夫命之與相猶聲之與響聲動乎幾響窮乎應
雖壽夭參差賢愚不一其間大較可得聞矣若
乃生而神睿弱而能言八彩光眉四瞳麗目斯
實天姿之特達聖人之符表洎乎日角月偃之
音龍棲虎踞之美地靜鎮於城纏天關運於掌
策金槌玉枕磊落相望伏犀起蓋隱鱗交映井
宅旣兼食匱已實抑亦帝王卿相之明効也及

其深目長頸頽頽感觸馳行驚立猥喙鳥喙筋
不束體血不華色手無春莢之柔髮有寒蓬之
悴或先吉而後凶或少長乎窮乏不其悲歟至
如姬公凝負圖之容孔髮渺栖遑之迹豐本知
其有後黃中明其可貴其間或躍馬膳珍或飛
而食肉或卑隸晚侯初形未正銅鑿無以飽生
玉饌終乎餓死因斯以觀何事非命

自序

暖字孝標平原人也生於秣陵縣朞月歸故鄉
八歲遇桑梓顛覆身充僕圉齊永明四年二月
逃還京師後爲崔豫州刑獄叅軍梁天監中詔
峻東掌石渠閣以病乞骸骨隱東陽金華山余
嘗自比馮敬通而有同之者三異之者四何則
敬通雄才冠世志剛金石余雖不及之而節亮
慷慨此一同也敬通值中興明君而終不試用
余逢命世英主亦擯斥當年此二同也敬通有

忌妻至於身操井臼余有悍室亦令家道轍軻
此三同也敬通當更始之世手握兵符躍馬食
肉余自少迄長戚戚無歡此一異也敬通有子
仲文官成名立余禍同伯道永無血胤此二異
也敬通膂力剛強老而益壯余有犬馬之疾溘
死無時此三異也敬通雖芝殘蕙焚終填溝壑
而爲名賢所慕其風流郁烈芬芳久而彌盛余
聲塵寂寞世不吾知魂魄一去將同秋草此四
異也所以力自爲序遺之好事云

志

東陽金華山栖志

夫鳥居山上層巢木末魚潛淵下窟穴泥沙豈
好異哉蓋性自然也故有忽白壁而樂垂綸負
王鼎而要卿相行藏紛糾顯晦踳駁無異火炎
水流圓動方息斯則廟堂之與江海蓬戶之與
金閨並然其所然悅其所悅鳥足毛羽瘡痍在
其間哉予生自原野善畏難狎心駭雲臺朱屋
望絕高蓋青組且霑濡霧露彌願閒逸每思濯

清瀨息椒丘寤寐永懷其來尚矣矧專噬壤民
欲天從爰泊二毛得居巖穴所居東陽郡金華
山東陽實會稽西部是生竹箭山川秀麗臯澤
塊鬱若其群峰疊起則接漢連霞喬林布濩則
春青冬綠迴溪映流則十仞洞底膚寸雲合必
千里雨散信卓犖爽塏神居奧宅是以帝鴻遊
斯鑄鼎雨師寄此乘壘敞澗勒赤松之名山貽
縉雲之號近代江治中奮迅泥滓王徵士高拔
風塵龍盤鳳栖咸萃茲地襲幽碧瀾素石可致

人者哉金華山古馬鞍山也蘊靈藏聖列名
仙謬左元放稱此山云可免洪水五兵可合神
丹九轉金華之晉有紫巖山山色紅紫因此爲
稱靡迤坡陀下屬深渚嶙峋嵒嶻嶭上虧日月登
自山麓漸高漸峻壟路迫隘魚貫而升路側有
絕澗閘閘摩谿俯窺木杪焦原石邑匪獨危懸
至山將半便有廣澤大川臯陸隱賑予之臺寧
實在斯焉所居三面皆迴山周繞有象郭郭前
則平野蕭條目極通望東西帶二澗四時飛流

泉清瀾微霏滴瀝生響白波跳沫涵涌成音並
漕漕通引交渠綺錯懸溜瀉於軒甍激湍迴於
階砌俱帳無綆汲盥漱息瓶盆楓櫨椅櫪之樹
梓栢桂樟之木分形異色千族萬種結朱實包
綠裹杙白蒂抽紫莖楠蠹萃尊捎清風鳴籟垂
條欄戶布葉房櫳中谷淵濱華蘂攢列至於青
春緩謝萍生泉動則有都梁含馥懷香送芬長
樂負霜宜男沍露芙蕖紅華照水臯蘇縹葉從
風憑軒永眺蠲憂亡疾丘阿陵曲衆藥灌叢地

抗莖山筋抽節金鹽重於素璧玉鼓貴於明珠可以養性消病還年駐色不藉崔文黃散勿用負局紫光翺翺群鳳凰胎雨澂綠翼紅毛素纓翠氤肅肅毛羽關關好音皆馴狎園池旅食鷄鶩若乃鴻日伺辰響類鍾鼓鳴絃候曙聲像琴瑟玄援薄霧清嘽飛狶乘煙咏吟嘈囀嘹亮悅心娛耳諒所以跨躡管籥韜軼笙簧宅東起招提寺背巖面壑層軒引景邃宇臨崖博敞閒虛納祥生白左瞻右睎仁智所居故碩德名僧

振錫雲萃調心七覺詆訶五塵郁列戒香浴滋
定水至於熏鑪夜藝法鼓旦聞予則跼蹐捫衣
躬行頂禮詢道哲人欽和至教每聞此河紛梗
彼岸永寂熙熙然若登春臺而出宇宙唯善是
樂豈伊徒言寺東南有道觀亭亭崖側下望雲
雨蕙樓茵榭隱映林篁飛觀列軒玲瓏煙霧日
止却粒之氓歲集神仙之客餌星髓吸流霞將
乃雲衣霓裳乘龍馭鶴觀下有石井聳峙中澗
雕琢刻削頗類人工躍流濈濈湧決咽雷擊

雷吼駭目驚魂寺觀之前皆植修竹檀栾蕭瑟
被陵緣阜竹外則有良田區畛通接山泉膏液
鬱潤肥腴鄭白決漳莫之能擬致紅粟流溢鳧
鴈充厭春鱉旨膳碧雞冬葷味珍霜鷄穀巾取
於丘嶺短褐出自中園糞蔣逼側於池湖菅蒯
駢填於原隰養給之資生生所用無不阜實蕃
籬充牣產蠶歲始年季農隙時閒濁醪初釀醪
清新熟則田家野老提壺典至班荆林下陳罇
置酌酒酣耳熱屢舞誼呶盛論箱庾高談穀稼

嗚噓謳歌舉盃相抗人生樂耳此歡豈訾若夫
蠶而衣耕而食日出而作日入而息晚食當肉
無事爲貴不求於世不忤於物莫辨榮辱匪知
毀譽浩蕩天地之間心無怵惕之警豈與嵇生
齒劍楊子墜閣較其優劣者哉

山齋集卷之二

梁平原劉峻孝標著

明閩漳張燮紹和纂

論

辯命論

有序

主上嘗與諸名賢言及管仲歎其有俊才而位
不達時有在赤墀之下預聞斯議歸以告余余
謂士之窮通無非命也故謹述天旨因言其致
云爾

臣觀管輅天才英偉珪璋特秀實海內之名傑
豈日者卜祝之流乎而官止少府丞年終四十
八天之報施何其寡歟然則高才而無貴仕饗
餐而居大位自古所歎焉獨公明而已哉故性
命之道窮通之數天闕紛綸莫知其辯仲任蔽
其源子長闡其惑至於鴟冠甕牖必以懸天有
期鼎貴高門則曰唯人所召譎譎謹昨異端斯
起蕭遠論其本而不暢其流子玄語其流而未
詳其本嘗試言之曰夫道生萬物則謂之道生

而無主謂之自然自然者物見其然不知所以然同焉皆得不知所以得鼓動陶鑄而不爲功庶類混成而非其力生之無亭毒之心死之豈虔劉之志墜之淵泉非其怒昇之霄漢非其悅蕩乎大乎萬寶以之化確乎純乎一化而不易化而不易則謂之命令也者自天之命也定於冥兆終然不變鬼神莫能預聖哲不能謀觸目之力無以抗倒日之誠弗能感短則不可緩之於寸陰長則不可急之於箭漏至德未能踰上

智所不免是以當放勳之世浩浩襄陵天乙之時焦金流石文公靈其尾宣尼絕其糧顏回敗其叢蘭冉耕歌其芣苢夷叔斃淑媛之言子輿困臧倉之訴聖賢且猶若此而况庸庸者乎至乃伍員浮屍於江流三閭沉骸於湘渚賈大夫沮志於長沙馮都尉皓髮於郎署君山鴻漸鏃羽儀於高雲敬通鳳起摧迅翮於風穴此豈才不足而行有遺哉近世有沛國劉瓛瓛弟璡並一時秀士也瓛則關西孔子通涉六經循循善

誘服腐儒行璣則志烈秋霜心貞豈玉碎乎
竦不雜風塵皆毓德於衡門並馳聲於天地而
官有徵於侍郎位不登於執戟相次殂落宗祀
無饗因斯兩賢以言古則昔之玉質金相英髦
秀達皆擯斥於當年韞竒才而莫用候草木以
共彫與麋鹿而同死膏塗平原骨填川谷埋滅
爾無聞者豈可勝道哉此則宰衡之與阜隸容
彭之與殤子猗頓之與黔婁陽文之與敦洽咸
得之於自然不假道於才智故曰死生有命富

貴在天其斯之謂矣然命體周流變化非一或
先號後笑或始吉終凶或不召自來或因人以
濟交錯糾紛廻環倚伏非可以一理徵非可以
一途驗而其道密微寂寥忽恍無形可以見無
聲可以聞必御物以效靈亦憑人而成象譬天
王之冕旒任百官以司職而或者覩湯武之龍
躍調戡亂在神功聞孔墨之挺生謂英睿擅奇
譽視韓彭之豹變調驚猛致人爵見張栢之朱
紱謂明經拾青紫豈知有力者運之而趨乎故

言而非命有六蔽焉余請陳其梗槩夫靡顏厲
理喙鳴臆顙形之異也朝秀晨終龜鵠千歲年
之殊也聞言如響智昏菽麥神之辯也固知三
者定乎造化榮辱之境獨曰由人是知二五而
未識於十其蔽一也龍犀日角帝王之表河目
龜文公侯之相撫鏡知其將刑壓紐顯其膺錄
星虹樞電昭聖德之符夜哭聚雲鬱興王之瑞
皆兆發於前期渙汗於後葉若謂驅貔虎奮人
劍入紫薇升帝道則未達宵冥之情未測神明

之數其蔽二也空桑之里變成洪川歷陽之都
化爲魚鼈楚師屠漢卒睢河鯁其流秦人坑趙
士沸聲若雷震火炎崑岳礫石與琬琰俱焚嚴
霜夜零蕭艾與芝蘭俱盡雖游夏之英才伊顏
之殆庶焉能抗之哉其蔽三也或曰明月之珠
不能無類夏后之璜不能無考故亭伯死於縣
長相如卒於圉令才非不傑主非不明也而碎
結綠之鴻輝殘懸黎之夜色抑尺之量有短哉
若然者主父偃公孫弘對策不升第歷說而不

入牧豕灌原見棄州部設令忽如過隙瀝死霜
露其爲誰恥豈崔馬之流乎及至開東閣列五
鼎電照風行聲馳海外寧前愚而後智先非而
終是終榮悴有定數天命有至極而謬生妍蚩
其蔽四也夫虎嘯風馳龍興雲屬故重華立而
元凱升辛受生而飛廉進然則天下善人少惡
人多闇主衆明君寡而薰蕕不同器梟鸞不接
翼是使渾敦櫛杌踵武於雲臺之上仲容廷堅
耕耘於巖石之下橫譚廢興在我無繫於天其

蔽五也彼戎狄者人面獸心宴安鴟毒以誅殺
爲道德以蒸報爲仁義雖大風立於青丘鑿齒
奮於華野比其狼戾曾何足喻自金行不競天
地版蕩左帶沸脣乘間電發遂覆瀍洛傾五都
居先王之桑梓竊名號於中縣與三皇競其萌
黎五帝角其區宇種落繁熾充牣神州嗚呼福
善禍淫徒虛言耳豈非否泰相傾盈縮遞運而
汨之以人其蔽六也然所謂命者死生焉貴賤
焉貧富焉治亂焉禍福焉此十者天之所賦也

思智善惡此四者人之所行也夫神非羣心
異朱均才結中脲在於所習是以素絲無恒玄
黃代起鮑魚芳蘭入而自變故季路學於仲尼
厲風霜之節楚穆謀於潘崇成殺逆之禍而商
臣之惡盛業光於後嗣仲由之善不能息其結
纓斯則邪正由於人吉凶在乎命也或以鬼神
害盈皇天輔德故宋公一言法星三徙殷帝自
翦千里來雲若使善惡無徵未洽斯義且于公
高門以待封嚴毋掃墓以望喪此君子所以自

彊不息也如使仁而無報奚爲修善立名乎斯
徑廷之辭也夫聖人之言顯而晦微而婉幽遠
而難聞河漢而不測或立教以進庸怠或言命
以窮性靈積善餘慶立教也鳳鳥不至言命也
今以其片言辨其要趣何異乎夕死之類而論
春秋之變哉且荆昭德音丹雲不卷周宣祈雨
珪璧斯罄于叟種德不逮勛華之高延年殘獷
未甚東陵之酷爲善一爲惡均而禍福異其流
廢興殊其迹蕩蕩上帝豈如是乎詩云風雨如

勝鷄鳴不已故善人爲善焉有息哉夫食糟糠
進芻豢衣狐貉襲冰紈觀窈窕之奇舞聽雲和
之琴瑟此生人之所急非有求而爲也修道德
習仁義敦孝悌立忠貞漸禮樂之腴潤蹈先生
之盛則此君子之所急非有求而爲也然則君
子居正體道樂天知命明其無可奈何識其不
由智力逝而不召來而不距生而不喜死而不
憾瑤臺夏屋不能悅其神土室編蓬未足憂其
慮不充訓於富貴不遑遑於所欲豈有史公董

劉方曹集

卷二

七

相不遇之文乎

廣絕交論

客曰主人曰朱公叔絕交論爲是乎爲非乎主人曰客奚此之間客曰夫草蟲鳴則阜螽醒雕虎嘯而清風起故細縕相感霧涌雲蒸嚶鳴相召星流電激是以王陽登則貢公喜罕生逝而國子悲且心同琴瑟言鬱郁於蘭茝道協膠漆志婉孌於墳簞聖賢以此鏤金版而鐫盤盂書玉牒而刻鍾鼎若乃匠人輟成風之妙巧伯子息流波之雅引范張款款於下泉尹班陶陶於

未夕絡繹縱橫烟霏雨散巧歷所不知心計莫
能測而朱益州汨彛敘越謨訓捶直切絕交遊
比黔首以鷹鷂嬾人靈於豺虎蒙有猜焉請辨
其惑主人听然而笑曰客所謂撫絃徽音未達
燥濕變響張羅沮澤不覩鴻鴈雲飛葢聖人握
金鏡闡風烈龍驤躡屈從道汙隆日月聯璧贊
壺壺之弘致雲飛電薄顯棣華之微旨若五音
之變化濟九成之妙曲此朱生得玄珠於赤水
謨神睿而爲言至夫組織仁義琢磨道德歡其

樂極其陵夷寄通靈臺之下遺跡江湖之上
風雨急而不輟其音霜雪零而不淪其色斯賢
達之素交歷萬古而一遇遠叔世民訛狙詐颺
起谿谷不能踰其險鬼神無以究其變競毛羽
之輕趨錐刀之末於是素交盡利交興天下蚩
蚩鳥驚雷駭然利交同源派流則異較言其略
有五術焉若其寵釣董石權壓梁竇雕刻百工
鑪錘萬物吐漱興雲雨呼噏下霜露九域聳其
風塵四海疊其燠灼靡不望影星奔藉響川騫

雞人始唱鶴蓋成陰高門旦開流水接軫皆願
摩頂至踵墮膽抽腸約同要離焚妻子誓徇荆
卿湛七族是曰勢交其流一也富埒陶白貫巨
程羅山擅銅陵家藏金穴出平原而聯騎居里
閭而鳴鐘則有窮巷之賓繩樞之子冀宵燭之
末光邀澗屋之微澤魚貫鳬躍馳沓鱗萃分鴈
驚之稻梁霑玉笋之餘瀝銜恩過進款誠援青
松以示心指白水而旌信是曰賄交其流二也
陸大夫讌喜西都郭有道人倫東國公卿貴其

驚甚搢紳羨其登僦加以歛黷臧頽涕唾流沫
騁黃馬之劇談縱碧雞之雄辯敘溫燠則寒谷
成暄論嚴苦則春叢零葉飛沈出其顧指榮辱
定其一言於是有弱冠王孫縉紳公子道不挂
於通人聲未遑於雲閣攀其鱗翼丐其餘論附
驥驥之旄端軼歸鴻於碣石是日談交其流三
也陽舒陰慘生民大情憂合歡離品物恒性故
魚以泉涸而煎涿鳥因將死而哀鳴同病相憐
綴河土之悲曲恐懼寘懷昭谷風之盛典斯則

斷金由於湫隘刎頸起於苦葢是以伍員灑漑
於宰嚭張王撫翼於陳相是日窮交其流四也
馳驚之倫澆薄之俗無不操權衡秉纖纊衡所
以揣其輕重纊所以屬其鼻息若衡不能舉纊
不能飛雖顏冉龍翰鳳雛曾史蘭薰雪白舒向
金玉淵海卿雲黻黻河漢視若游塵遇同土梗
莫肯費其半菽罕有落其一毛若衡重鎔銖纊
微影撇雖共工之蒐慝驩兜之掩義南荆之政
扈東陵之巨猾皆爲匍匐逶迤折枝砥疇金

翠石將其意臆青便辟導其誠故輪蓋所遊必
非夷惠之室苞苴所入實行張霍之家謀而後
動毫芒寡忒是曰量交其流五也凡斯五交義
同賈常桓譚譬之於閭閻林回論之於甘醴夫
寒暑遞進盛衰相襲或前榮而後悴或始富而
終窮或初存而末亡或古約而今泰循環翻覆
迅若波瀾此則徇利之情未嘗異變化之道不
得一由是觀之張陳所以凶終蕭朱所以隙末
斷焉可知也而翟公方規規然勒門以箴客何

所見之晚乎因此五交是生三釁敗德殄義禽獸相若一釁也難固易携讐訟所聚二釁也名陷饕餮貞介所羞三釁也古人知三釁之爲梗懼五交之速尤故王丹威子以櫝楚朱穆昌言而示絕有旨哉近世有樂安任昉海內髦傑早綰銀黃夙昭民譽適文麗藻方駕曹王英特俊邁聯橫許郭類田文之愛客同鄭莊之好賢見一善則肝衡扼腕遇一才則揚眉抵掌雌黃出其脣吻朱紫由其月且於是冠蓋輻輳衣裳雲

合輶擊轡坐客恒滿蹈其闕闕若升闕里之
堂入其奧隅謂登龍門之阪至於顧盼增其倍
價翦拂使其長鳴影組雲臺者摩肩趨走丹墀
者疊跡莫不締恩狎結綢繆想莊惠之清塵庶
羊左之微烈及瞑目東粵歸骸洛浦總帳猶懸
門罕漬酒之彥墳未宿草野絕慟輪之賓藐爾
諸孤朝不謀夕流離大海之南寄命瘡痍之地
自昔把臂之英金蘭之友曾無羊舌下泣之仁
靈慕邠成分宅之德嗚呼世路嶮巇一至於此

太行孟門豈曰蘄絕是以耿介之士疾其窘斯
裂裳裹足棄之長驚獨立高山之頂歡與麋鹿
同群皦皦然絕其汚濁誠恥之也誠畏之也

附錄

劉峻傳

陳姚察

劉峻字孝標平原人父珽宋始興內史峻生朞
月母攜還鄉里宋泰始初青州陷魏峻年八歲
爲人所略至中山中山富人劉實愍峻以束帛
贖之教以書學魏人聞其江南有戚屬更徙之
桑乾峻好學家貧寄人廡下自課讀書常燎麻
炬從夕達旦時或昏睡焚其髮旣覺復讀終夜
不寐其精力如此齊永明中從桑乾得還自謂

所見不博更求異書聞京師有者必往祈借清
河崔慰祖謂之書淫時竟陵王子良博招學士
峻因人求爲子良國職吏部尚書徐孝嗣抑而
不許用爲南海王侍郎不就至明帝時蕭遙欣
爲豫州爲府刑獄禮遇甚厚遙欣尋卒久之不
調天監初召入西省與學士賀蹤典校秘書峻
兄孝慶時爲青州刺史峻請假省之坐私載禁
物爲有司所奏免官安成王秀好峻學及遷荆
州引爲戶曹參軍給其書籍使抄錄事類名曰

類苑未及成復以疾去因遊東陽紫巖山築室
居焉爲山栖志其文甚美高祖招文學之士有
高才多被引進擢以不次峻率性而動不能隨
衆浮沉高祖頗嫌之故不任用峻乃著辨命論
以寄懷論成中山劉沼致書以難之凡再反峻
並爲申析以答之會沼卒不見峻後報者峻乃
爲書以序之其論文多不載峻又嘗爲自序比
馮敬通居東陽吳會人士多從其學普通二年
卒時年六十門人謚曰玄靖先生

劉峻傳

唐李延壽

峻字孝標本名法武懷珍從父弟也父琬之仕宋爲始興內史峻生替月而琬之卒其母許氏攜峻及其兄法鳳還鄉里宋泰始初魏尅青州峻時年八歲爲人所略爲奴至中山中山富人劉寶愍峻以束帛贖之教以書學魏人聞其江南有戚屬更徙之代都居貧不自立與母並出家爲尼僧旣而還俗峻好學寄人廡下自課讀書常燎麻炬從夕達旦時或昏睡焚其鬚髮及

覺復讀其精力如此時魏孝文選盡物望江南
人士才學之徒咸見申擢峻兄弟不蒙選授齊
永明中俱奔江南更改名峻字孝標自以少時
未開悟晚更厲精明慧過人苦所見不博聞有
異書必往祈借清河崔慰祖謂之書淫於是博
極群書文藻秀出故其自序云黌中濟濟皆升
堂亦有愚者解衣裳言其少年魯鈍也時竟陵
王子良招學士峻因人求爲子良國職吏部尚
書徐孝嗣抑而不許用爲南海王侍郎不就至

齊明帝時蕭遙欣爲豫州引爲府刑獄禮遇甚厚遙欣尋卒久不調梁天監初召入西省與學士賀縱典校祕閣峻兄孝慶時爲青州刺史峻請假省之坐私載禁物爲有司所奏免官安成王秀雅重峻及安成王遷荊州引爲戶曹參軍給其書籍使撰類苑未及成復以疾去因遊東陽紫巖山築室居焉爲山栖志其文甚美初梁武帝招文學之士有高才者多被引進擢以不次峻率性而動不能隨衆沈浮武帝每集文士

策經史事時范雲沈約之徒皆引短推長帝乃
悅加其賞賚曾策錦被事咸言已罄帝試呼問
峻峻時貧悴冗散忽請紙筆疏十餘事坐客皆
驚帝不覺失色自是惡之不復引見及峻類苑
成凡一百二十卷帝卽命諸學士撰華林徧略
以高之竟不見用乃著辨命論以寄其懷論成
中山劉沼致書以難之凡再反峻並爲申析以
答之會沼卒不見峻後報者峻乃爲書以序其
事其文論並多不載嘗爲自序比馮敬通遺之

好事云峻本將門兄法鳳自杜歸改名孝慶字
仲昌早有幹略齊末爲兗州刺史舉兵應梁武
封餘干男歷官顯重峻獨篤志好學居東陽吳
會人士多從其學普通二年卒年六十門人謚
曰玄靖先生

讀史考誤

明張燮

魏書凡南人歸北者，僻極推許。若到底還南者，輒橫加詆訶。如劉孝標，早孤，初名法武，與母兄俱陷魏，雖貧不能自立，然精勤嗜學，燎炬達旦。至永明中，得還，儻以其未經位宦，史氏置之不載，是矣。乃魏書附列於劉休賓後，妄謂其兄弟疎薄，不倫爲時所棄。又謂高祖選盡物望才學之徒，咸見申擢，而法鳳兄弟無可收用，不蒙選受。夫其不蒙選受也，自是魏不知人，乃謂劉了

無可取乎然則孝標後爲一代名流法鳳改名
孝慶有幹畧爲齊兗州刺史入梁封餘干男豈
真疎薄不倫無可收用乎如佛助者可謂大言
不慚矣

紫巖

明柱 栢

紫巖千仞翠屏張
日落巖西晚興長
尚憶孝標弦誦處
至今草木有餘光

劉參軍孝標

明胡應麟

嗟峨嫫女郡星斗
垂寒芒寥寥曠千載
氣運開齊梁劉生實
天啓乳哺隨高堂
翻然自北來燁若孤
鳳凰讀書紫薇岫
一目逾十行山棲表
遠志絕交厓中腸
千言走珠貝七錄披
琳瑯含毫策錦被
倏忽驚巖廊遂命世
主忌坎壈終詞塲

龍蛇諒斯在鴻鵠詎可量矯矯七尺軀恥爲萬
乘降胡然際悍室妖牝啼朝陽潛身嘆狐犢跋
足追亡羊太息敬通論今古爲徬徨

遺事

劉峻見任昉諸子西華兄弟流離不能自振坐
平舊交莫有收恤西華冬月著葛屨練裙路逢
峻峻泫然矜之乃廣朱公叔絕交論到漑見其
論抵几於地終身恨之

李善文選註

齊末兵火延及祕閣有梁之初缺亡甚衆爰命
祕書監任昉躬加部集又於文德殿內別藏衆
書使學士劉孝標等重加校進

阮孝緒七錄序

孝標隱金華紫微巖講授生徒今靈巖古剎即

其故宅

金華志

集評

素標植根溜石流寓魏庭曷屢艱危僅至江左
負材矜地自謂坐致雲霄豈圖逡巡十稔而榮
慙一命因茲著論故辭多憤激雖義越典謨而

是杜浮競矣

劉璠
梁典

立交三黜劉峻知言哉

文中
子

立局啓足爲南橋解嘲

王元
美